

ПОНЕДЕЛЬНИК 8-ОЙ СЕДМИЦЫ ПО ПАСХЕ

В НЕДЕЛЮ ВЕЧЕРА СВЯТЫЯ ПЯТДЕСЯТНИЦЫ

Знаменает последования ради коленопреклонения.

Начинает иерей: **Благословен Бог наш:** И глаголет учиненный чтец: **Царю Небесный:** и предначинательный псалом: **Таже** диакон, **аще есть, аще же ни,** священник глаголет ектению великую:

Диакон: **Миром** Господу помолимся.

Диакон: **О** свышнем мире:

Диакон: **О** мире всего мира:

Диакон: **О** святем храме сем:

Диакон: **О** господине нашем Пресвященнейшем епископе [...], честнем пресвитерстве, и еже во Христе диаконстве, о всем причте и людех:

Диакон: **О** богохранимей стране нашей, властех и воинстве ея, Господу помолимся.

Диакон: **О** граде сем:

Диакон: **О** благорастворении воздуш:

Диакон: **О** плавающих:

Диакон: **О** предстоящих людех и ожидающих благодати Святаго Духа, Господу помолимся.

Диакон: **О** приклоняющих сердца своя пред Господем и колена, Господу помолимся.

Диакон: **О** еже укрепитися нам к совершению богоугодне, Господу помолимся.

Диакон: **О** еже низпослатися богатым милостем его на ны, Господу помолимся.

Диакон: **О** еже прияти коленоприклонения наша яко фимиами пред ним, Господу помолимся.

Диакон: **О** требующих от Него помощи, Господу помолимся.

Диакон: **О** избавитися нам:

Диакон: **Заступи, спаси:**

Диакон: **Пресвятую, Пречистую:**

Таже священник возглас: **Яко** подобает Тебе всякая слава, честь и поклонение, Отцу, и Сыну, и Святому Духу, ныне и присно, и во веки веков.

Таже поем: **Господи** **воззвах:** и поставим стихов 6.

И поем стихиры самогласны, глас 4-й:

Преславная днесь видеша вси языцы во граде Давидове, егда Дух сниде Святый во огненных языцех, якоже богоглаголивый Лука повествует, глаголет бо: собранным учеником Христовым, бысть шум, якоже носиму дыханию бурну, и исполни дом, идеже бяху седяще: и вси начаша глаголати странными глаголы, странными учении, странными повелении Святыя Троицы. **[Дважды.]**

Дух Святый бе убо присно, и есть, и будет: ниже начинаемь, ниже престаяй, но присно Отцу и Сыну счинен и счисляемь: Живот, и животворяй: Свет, и света податель, самоблагий, и источник благодати: Имже Отец познавается, и Сын прославляется, и от всех познавается, едина сила, едино счисление, едино поклонение Святыя Троицы. **[Дважды.]**

Дух Святый Свет и Живот, и живой источник умный: Дух премудрости, Дух разума, благий, правый, умный: обладаяй, очищаяй прегрешения: Бог и боготворяй, Огнь от Огня происходяй: глаголай, дейй, разделяй дарования, Имже пророцы вси, и божественнии апостоли с мученики венчапаша, странное слышание, странное видение, огнь разделяйся в подаяние дарований. **[Дважды.]**

Слава, и ныне: глас 6-й:

Царю Небесный, Утешителю, Душе истины, Иже везде сый, и вся исполняй, Сокровище благих, и жизни Подателю, прииди и вселися в ны, и очисти ны от всякия скверны, и спаси Блаже души наша.

Вход с кадилом. Свете тихий:

Прокимен великий, глас 7-й: Кто Бог велий яко Бог наш? * Ты еси Бог творяй чудеса.

Стих 1: Сказал еси в людех силу Твою.

Стих 2: И рех: ныне начах, сия измена десницы Вышняго.

Стих 3: Помянух дела Господня, яко помяну от начала чудеса Твоя.

И паки: Кто Бог велий яко Бог наш? * Ты еси Бог творяй чудеса.

Таже возглашает священник, или диакон: Паки и паки, приклонше колена, Господу помолимся.

Мы же, Господи помилуй, [Грижды]

Нам же приклоншым колена на земли, и непокровенным сущым, чтет иерей молитвы во олтаре велегласно на люди.

Пречисте, нескверне, безначальне, невидиме непостижиме, неизследиме, непременно, непобедиме, неизчетне, незлобиве Господи, един имеяй безсмертие, во свете живой неприступном, сотворивый небо и землю, и море, и вся созданная на них, прежде еже просити, всем прошения подаваяй, Тебе молимся, и Тебе просим, Владыко Человеколюбче, Отца Господа и Бога и Спаса нашего Иисуса Христа, нас ради человеков, и нашего ради спасения

спешаго с небес, и воплотившагося от Духа Святаго и Марии Приснодевы, и Преславныя Богородицы, Иже первее убо словесы уча, последи же и дела показуя, егда спасительную страсть претерпе, подаде нам подписание смиренным, и грешным, и недостойным рабом Твоим, мольбы приносить Тебе, в выи и колен преклонениих, о своих гресех, и о людских неведениях. Сам Многомилостиве и Человеколюбче, услыши ны, вонъже аще день призовем Тя, изряднее же в день сей пятидесятный, вонъже по Вознесении Господа нашего Иисуса Христа на небеса, и седении одесную Тебе Бога и Отца, низпосла Святаго Духа на святых Своя ученики и апостолы, Иже и седе на едином коегождо их, и исполнишася вси неистощимыя благодати Его, и глаголаша языки иными величия Твоя, и прорекоша. Ныне убо молящихся Тебе, услыши нас, и помяни нас, смиренных и осужденных, и возврати пленение душ наших, Твое милование имея о нас молящееся. Приими нас, припадающих Тебе, и вопиющих: согрешихом, к Тебе привержени есмы от утробы, от чрева матере нашея, Ты еси Бог наш. Но яко исчезоша в суете дние наши, обнажихомся Твоя помощи, лишихомся всякаго ответа, но дерзающе на щедроты Твоя, зовем: грехи юности нашея и неведения не помяни, и от тайных наших очисти нас, и не отрини нас во время старости, внегда оскудети крепости нашей, не остави нас, прежде даже нам в землю не возвратится, сподоби к Тебе возвратиться, и вонми нам благоприятием и благодатию. Возмери беззакония наша щедротами Твоими, сопротив постави бездну щедрот Твоих множеству согрешений наших. Призри с высоты святых Твоя Господи, на предстоящих люди Твоя, и чающих еже от Тебе богатых милости. Посети нас благостию Твоею, избави нас от насильства диаволя, утверди живот наш святыми Твоими и священными законы. Ангела, верна хранителя пристави людем Твоим, всех собери в Твое Царствие. Дажь прощение уповающим на Тя, остави им и нам грехи. Очисти нас действием Святаго Твоего Духа, разруши яже на нас козни вражия.

Присовокупляет же и сию молитву:

Благословен еси Господи Владыко Вседержителю, просветивый день светом солнечным, и ночь уяснивый зарями огненными, долготу дневную преити нам сподобивый, и приблизитися начатком ночи, услыши моления наша, и всех людей Твоих, и всем нам простив вольных и невольных грехи. Приими вечерняя наша моления, и низпосли множество милости Твоя, и щедроты Твоя на достояние Твое. Остени нас святыми ангелы Твоими, вооружи нас оружием правды Твоя, огради нас истиною Твоею, соблюди нас силою Твоею, избави нас от всякаго обстояния, всякаго навета сопротиволежащаго. Подаждь же нам и настоящий вечер, с приходящею ноцию, совершен, свят мирен, безгрешен, безсребетен, безмечтанен, и вся дни живота нашего, молитвами святых Богородицы, и всех святых от века Тебе благоугодивших.

Абие же глаголет диакон: Заступи, спаси, помилуй, возстави, и сохрани нас Боже Твоею благодатию.

Лик: Господи помилуй. [Единожды]

Пресвятую, Пречистую, Преблагословенную, Славную Владычицу нашу Богородицу, и Приснодеву Марию, со всеми святыми помянувшие, сами себе, и друг друга, и весь живот наш Христу Богу предадим.

Таже иерей возглас: Твое бо есть, еже миловати, и спасати нас Господи Боже наш, и Тебе славу возсылаем, Отцу, и Сыну, и Святому Духу, ныне и присно и во веки веков.

Лик: Аминь.

Посем иерей, или диакон глаголет сия:

Диакон: Рцем вси от всея души, и от всего помышления нашего рцем.

Лик: Господи помилуй. [Единожды]

Диакон: Господи Вседержителю Боже отец наших, молим Ти ся, услыши и помилуй.

Лик: Господи помилуй. [Единожды]

Диакон: Помилуй нас Боже, по велицей милости твоей, молим Ти ся, услыши и помилуй.

Лик: Господи помилуй. [Трижды]

Диакон: Еще молимся о господине нашем преосвященнейшем епископе [...], и о всей во христе братии нашей.

Лик: Господи помилуй. [Трижды]

Диакон: Еще молимся о богохранимем стране нашей, властех, и воинстве ея, да тихое и безмолвное житие поживем во всяком благочестии и чистоте.

Лик: Господи помилуй. [Трижды]

Диакон: Еще молимся о блаженных и приснопамятных создателях святых обители сея.

Лик: Господи помилуй. [Трижды]

Диакон: Еще молимся о милости, жизни, мире, здравии, спасении, посещении, прощении, и оставлении грехов рабов божиих братии святых обители сея.

Лик: Господи помилуй. [Трижды]

Диакон: Еще молимся о плодоносящих, и добродееющих, во святем и всечестнем храме сем, труждающихся, поющих, и предстоящих людех, ожидающих от Тебе великия и богатыя милости.

Таже священник, возглас: Яко милостив и человеколюбец Бог еси, и Тебе славу возсылаем, Отцу, и Сыну, и Святому Духу, ныне и присно, и во веки веков.

Лик: Аминь.

Абие же диакон глаголет:

Диакон: Паки и паки приклонше колена, Господу помолимся.

Лик: Господи помилуй. [Трижды]

И приклоняем колена по предписанному.

Чтет нереи 2-ю молитву во услышание всех:

Господи Иисусе Христе Боже наш, мир Твой подавый человеком, и Пресвятаго Духа дар, еще в житии и с нами сый, в наследие неотъемлемое верным присно подаваяй, явленнейше же сию благодать Твоим учеником и апостолом днесь низпославый, и сих устне огненными утвердивый языки, имиже весь род человеческий боговедение своим языком в слух уха приимше, светом Духа просветихомся, и прелести якоже тмы изменихомся, и чувственных и огненных язык раздаянием, и преестественным действием, еже в Тя веры научихомся, и Тебе богословити со Отцем и Святым Духом, во едином Божестве, и силе, и власти озарихомся. Ты убо Отчее сияние, существа и естества Его неизменное и недвижимое начертание, источниче премудрости и благодати, отверзи и мне грешному устне, и научи мя, како достоин, и о ихже потреба молитися, Ты бо еси ведый многое грехов моих множество, но Твое благоутробие победит сих безмерное. Се бо страхом предстою Ти, в пучину милости Твоя отчаяние души моя поверг, окорми живот мой словом всю тварь неизреченною премудрости силою управляяй, тихое обуреваемых пристанище, и скажи ми путь, вонже пойду. Дух премудрости Твоя моим подаждь помышлением, Дух разума безумию моему даруяй, Духом страха Твоего моя осени дела, и Дух Правый обнови во утробе моей, и Духом Владычним мыслей моих поползновение утверди, да на всяк день Духом Твоим Благим к полезному наставляемь, сподоблюся творити заповеди Твоя, и Твое присно памятовати славное пришествие, и истязательное содеянных нами. И да не презриши мя тленными сопредельными мира сего красными, но будущих восприятия желати укрепи сокровищ. Ты бо рекл еси, Владыко, яко елика аще кто просит о Твоем имени, невозбранно приемлет от Твоего присносущнаго Бога и Отца. Темже и аз грешный в пришествии Святаго Твоего Духа, Твою молю благодать, елика просих, воздаждь ми во спасение. Ей Господи, всякаго благодеяния богатый дателью, и подателю Благий, яко Ты еси подаваяй

преизобильно ихже просим, Ты еси сострадательн и милостивый, Иже безгрешно быв плоти наша общник, и приклоняющим к Тебе колена, приклоняйся любоблагоутробне, очищение же быв грехов наших. Дажь убо Господи, людем Твоим щедроты Твоя, услыши нас с небесе святаго Твоего, освяти нас силою спасительных десниц Твоя, покрый нас кровом крилу Твоею, да не презриши дел руку Твоею. Тебе единому согрешаем, но и Тебе единому служим. Не вемы кланятися богу чуждему, ниже простирати руки наша, Владыко, к богу иному. Остави нам согрешения, и приим наша коленопоклонная моления, простри всем нам руку помощи, приими молитву всех яко кадило приятное, восприемлемое пред Твоим преблагим Царством.

Присовокупляет же и сию:

Господи Господи, избавлей нас от всякия стрелы летящия во дни. Избави нас и от всякия вещи во тьме преходящия. Приими жертву вечернюю рук наших воздеяния. Сподоби же нас и нощное поприще без порока прейти неискушены от злых. И избави нас от всякаго смущения и боязни, яже от диавола нам прибывающия. Даруй душам нашим умиление, и помыслом нашим попечение, еже на страшнем и праведнем Твоем суде испытания. Пригвозди страху Твоему плоти наша, и умертви уды наша сущия на земли. Да и сонным безмолвием просветимся, зрением судеб Твоих. Отыми же от нас всякое мечтание неподобное и похоть вредну. Возстави же нас во время молитвы утверждены в вере, и преспевающия в заповедех Твоих.

Диакон: Заступи, спаси, помилуй, возстави, и сохрани нас Боже:

Диакон: Пресвятую, Пречистую, Преблагословенную:

Иерей возглас: Благоволением и благостию едиnorodнаго Сына Твоего, с Нимже благословен еси, с Пресвятым, и Благим, и Животворящим Твоим Духом, ныне и присно и во веки веков, аминь.

Таже: Сподоби Господи в вечер сей:

Посем же глаголет диакон: Паки и паки приклонше колена, Господу помолимся.

Лик: Господи помилуй. [Трижды]

И нам такожде колена приклоншым.

Иерей чтет третью молитву:

Приснотекущий, животный, и просветительный источниче, соприносущная Отцу содетельная сило, все смотрение за спасение человеческое прекрасне исполнявый, Христе Боже наш, смерти узы неразрешимыя, и заклепы адовы расторгнувый, лукавых же духов множество поправый. Приведай Себе о нас непорочное зачатие, и тело давай пречистое в жертву, всякаго греха неприкосновенное же и непроходное, и страшным сим, и неисповедимым священнодействием живот нам вечный

даровавый, во ад спедый, и верей вечныя сокрушивый, и во тме сидящим восход показавый, началозлобнаго же и глубиннаго змия богомудростным льщением уловивый, и веригами мрака связавый в тартаре и огни негасимом, и во тме кроменшей неисчетнословною Твоею затвердивый крепостию, великоименитая Премудросте Отчая, напастуемым великий помощник явивыйся, и просветивый сидящия во тме и сени смертной. Ты славы присносущныя Господи, и Отца Вышняго Сыне возлюбленный, присносущный Свете от присносущнаго Света, Солнце правды, услыши нас, молящихся Тебе, и упокой души рабов Твоих, прежде усопших отец и братьев наших, и прочих сродник по плоти, и всех своих в вере, о нихже и память творим ныне, яко в Тебе всех держава, и в руце Твоей содержиши вся концы земли. Владыко Вседержителю, Боже отец и Господи милости, рода смертнаго же и бессмертнаго, и всякаго естества человеческого Содетелю, составляемаго же, и паки разрешаемаго, живота же и скончания, еже zde пребывания, и еже тамо преложения, лета измеряй живым, и времена уставляй смерти, низводяй во ад и возводяй, связуяй в немощи, и отпуцай в силе, настоящая потребне строй, и будущая полезно управляй, смертным жалом узвенных воскресения надеждами веселяй. Сам убо Владыко всех, Боже Спасителю наш, надежде всех концов земли, и сущих в мори далече, Иже и в сей последний и великий спасительный день Пятидесятницы праздника, тайну Святыя и Единосущныя, и соприсносущныя, и неразделимыя, и неслиянныя Троицы показавый нам, и наитие и пришествие Святаго и Животворящаго Твоего Духа, в виде огненных языков на святыя Твоя апостолы излиывый, и благовестники тех поставивый, благочестивыя нашея веры, и исповедники и проповедники истиннаго богословия показавый. Иже и в сей всесовершенный и спасительный праздник, очищения убо молитвенная, о иже во аде держимых сподобивый приимати, великия же подаваяй нам надежды ослабления содержимым от содержащих я скверн, и утепению Тобою низпослатися. Услыши нас, смиренных, и Твоих раб молящихся Ти, и упокой души рабов Твоих, прежде усопших, на месте светле, на месте злачне, на месте прохлаждения, отонудуже отбеже всякая болезнь, печаль и воздыхание и учини духи их в селениях праведных, и мира и ослабления сподоби их, яко не мертвии восхвалят Тя, Господи, ниже сущии во аде исповедание дерзнут принести Тебе, но мы, живии, благословим Тя и молим, и очистительныя молитвы и жертвы приносим Тебе о душах их.

Присовокупляет и сию молитву:

Боже великий, и вечный, Святый, человеколюбивый, сподобивый нас в сей час стати пред неприступною Твоею славою, на пение и хвалу чудес Твоих, очисти ны недостойныя рабы Твоя, и подаждь благодать еже сокрушенным сердцем, невозносительно приносить Тебе Трисвятое славословие, и благодарение великих Твоих даров, яже сотворил еси к нам, и твориши всегда в

нас. Помяни Господи немощь нашу, и да не погубиши нас со беззаконии нашими, но сотвори великую милость со смирением нашим, да греховныя тмы избежавше, во дни правды ходити будем, и одеявшеся оружием света, ненаветно пребудем от всякия козни лукаваго, и со дерзновением прославим о всех, Тебе единого истинного и Человеколюбца Бога. Твое бо яко воистинну и великое вресноту таинство, Владыко всех, и Творче, временное решение Твоих тварей, и еже по сих совокупление, и упокоение еже во веки. Тебе благодать о всех исповедуем, о входах наших, яже в мир сей, и исходах, надежды нам воскресения, и жизни нетленной, Твоим неложным обещанием предобручают, яже примем в будущем втором пришествии Твоем. Ты бо еси и воскресения нашего Начальник, и поживших неумытный и человеколюбивый Судия, и мздовоздаяния Владыка и Господь, Иже и приобщивыйся нам приискренно плоти и крове, низхождения ради крайняго, и наша страсти неотметныя, внегда волею во искус поставить, примим за милосердие щедрот, и в немже пострадал еси Сам искусився, искушаемым нам быв самообещанный помощник, темже и совозвел еси нас в Твое безстрастие. Приими убо Владыко, мольбы и моления наша, и упокой вся отцы коегождо, и матери, и чада, и братию, и сестры единокровныя, и купнородныя, и вся прежде почившия души, в надежди воскресения жизни вечныя учини духи их, и имена в книзе животней, в недрех Авраама, и Исаака, и Иакова, в стране живых, в Царствии Небеснем, в раи сладости, светлыми ангелы Твоими, вводя вся во святыя Твоя обители, совоздвизай и тела наша в день, вонже определил еси по святым Твоим и неложным обетованием. Несть убо Господи, рабом Твоим смерть, исходящим нам от тела, и к Тебе Богу нашему приходящим, но преставление от печальнейших на полезнейшая, и сладостнейшая, и на упокоение и радость. Аще же и что согрешихом к Тебе, милостив буди нам же и тем, зане ни один есть чист пред Тобою от скверн, ниже аще един день живота его есть, разве Ты точию един, на земли явивыйся безгрешный Господь наш Иисус Христос, Имже вси уповаем милость получитьи, и оставление грехов. Сего ради нам же и онем, яко Благ и Человеколюбец Бог, ослаби, остави, прости грехопадения наша, вольная и невольная, яже в ведении и не в ведении, предъявленная и забываемая, яже в деянии, яже в помышлении, яже в словеси, яже во всех наших житиях и движениях. И отшедшим убо свободу и ослабу даруй, нас же сущих zde благослови, конец благий и мирный даруя нам же и всем людем Твоим, и милости и человеколюбия утробу отверзаяй нам, на страшном и ужасном Твоем пришествии, и Царствия Твоего достойных нас сотвори.

Присовокупляет и сию молитву:

Боже великий и вышний, едине имеяй безсмертие, во свете живый неприступном, всю тварь мудростию создавый, разделивый посреде света, и посреде тмы. И солнце убо положивый во область дне, луну же и звезды во

область нощи. Сподобивый нас, грешных, и в настоящий день предварити лице Твое во исповедании, и вечернюю Тебе службу принести. Сам Человеколюбче Господи, исправи молитву нашу, яко кадило пред Тобою, и прими ю в воню благоухания. Подаждь же нам настоящий вечер и приходящую ночь мирну, облецы ны оружием света, избави нас от страха ночнаго, и от всякия вещи во тме преходящая. И даруй нам сон, иже во упокоение немоци нашей даровал еси, от всякаго диавольскаго мечтания изменен. Ей Владыко, всех благих подателю, яко да и на ложах наших умиляющеся воспомянем и в нощи пресвятое имя Твое. И поучением Твоих заповедей озаряеми, в радости душевной востанем к славословию Твоея благодати, молитвы и моления Твоему благоутробию приносяще о своих гресех, и о всех людех Твоих, ихже молитвами Пресвятыя Богородицы, в милости посети.

Диакон: Заступи, спаси, помилуй, возстави и сохрани нас Боже твоею благодатию.

Диакон: Пресвятую, Пречистую, Преблагословенную, Славную владычицу:

Иерей возглашает: Ты бо еси упокоение душ и телес наших, и Тебе славу возсылаем, Отцу, и Сыну, и Святому Духу, ныне и присно, и во веки веков.

Таже диакон: Исполним вечернюю молитву нашу:

Диакон: Заступи, спаси:

Диакон: Вечера всего совершенна:

Диакон: Ангела мирна:

Диакон: Прощения и оставления:

Диакон: Добрых и полезных:

Диакон: Прочее время живота

Диакон: Христианския кончины:

Диакон: Пресвятую, Пречистую:

Иерей возглашает: Яко благ и человеколюбец:

Лик: Аминь.

Иерей: Мир всем.

Лик: И духови твоему.

Диакон: Главы наша Господеви приклоним.

Иерей глаголет молитву обычную втай:

Господи Боже наш, приклонивый небеса, и спешый на спасение рода человеческого, призри на рабы Твоя, и на достояние Твое! Тебе бо страшному и Человеколюбцу Судии, Твои рабы своя приклониша главы и своя покориша

выи не от человек ожидающе помощи, но Твоея ожидающе милости, и Твоего чающе спасения, яже сохрани на всякое время, и в настоящем часе же и вечере и в приходящую ночь, от всякаго врага, от всякаго сопротиволежащаго действия дьявольскаго, помышлений суетных, и воспоминаний лукавых.

Таже Иерей: возглашает: **Буди держава:**

И посем сошедшеся оба лика, поем на стиховне:

Стихиры самогласны, глас 3-й:

Ныне в знамение всем яве языцы быша: иудеи бо от нихже по плоти Христос, неверием недуговавше, Божия благодати отпадоша: и Божественнаго света сущии от языков сподобихомся, утвердившеся словесы учеников, вещающих славу Благодетеля всех Бога: с нимиже сердца с коленами приклонше, верою поклонимся Святому Духу, утвердившеся Спасителем душ наших.

Стих: **Сердце чисто созижди во мне Боже, и Дух Прав обнови во утробе моей.**

Ныне Утешительный Дух на всякую плоть излился: от апостольских бо ликов наченший, от тех по причастию верным благодать простре, и уверяет Свое державное наитие во огненном виде, учеником раздаяй языки в песнопение и славу Божию. Темже сердца умно просвещаемы, в вере утвердившеся Святым Духом, молимся спастися душам нашим.

Стих: **Не отвержи мене от лица Твоего, и Духа Твоего Святаго не отыми от мене.**

Ныне облачатся державою Христовою с высоты апостоли: обновляет бо их Утешитель, в них обновляясь таинственным обновлением разума: иже странными гласы, и высокоглаголивыми проповедающе присносущное Естество же и простое, триипостасное почитати, Благодетеля всех Бога. Темже просветившеся оных ученьми, Отцу поклонимся с Сыном и Духом, молящися спастися душам нашим.

Слава, и ныне: глас 8-й:

Приидите людие триипостасному Божеству поклонимся, Сыну во Отце, со Святым Духом: Отец бо безлетно роди Сына соприсносущна, и сопрестольна, и Дух Святый бе во Отце с Сыном прославляемъ, едина Сила, едино Существо, едино Божество. Емуже покланяющиеся вси глаголем: Святый Боже, вся содеявый Сыном, содейством Святаго Духа: Святый Крепкий, Имже Отца познахом, и Дух Святый прииде в мир: Святый Безсмертный, утешительный Душе, от Отца исходяй, и в Сыне почивай, Троице Святая, слава Тебе.

Таже, **Н**ыне отпускаеши: **Трисвятое.** Пресвятая Троице: Отче наш: **Тропарь, глас 8:** Благословен еси Христе Боже наш:

Таже священник творит отпуст сице:

Иже от Отчих и Божественных недр истощивый Себе, и с небесе на землю сошедый, и наше все восприемый естество, и обоживый е, по сих же на небеса паки возшедый и одесную седый Бога и Отца, Божественного же и Святого и единосущного, и единосильного, и единославного, и соприисносущного Духа низпославый на святых Своих ученики и апостолы, и Сим просветивый убо их, теми же всю вселенную, Христос, истинный Бог наш, молитвами Пречистой и Пренепорочной святых Своих Матери, святых славных, прехвальных, богопроповедников, и духоносных апостолов, и всех святых, помилует и спасет нас, яко Благ и Человеколюбец.

В ТУ ЖЕ НЕДЕЛЮ 8-Ю, НА ПОВЕЧЕРИИ

Поем канон Святому Духу. Глас 1-й:

Творение Феофаново. Ирмос по дважды: тропари на 4. Егоже краестрожие: Духа пою создавшего всю тварь.

Песнь 1.

Ирмос: Горькия работы избавлься Израиль, непроходимое пройде яко сушу, врага зря потопляема, песнь яко Благодетелю поет Богу, чудодееющему мышцею высокою, яко прославися.

Припев: Слава Тебе Боже наш, слава Тебе.

Божественный Душе Святый, Иже всем разделяяй дарования, и вся творяй волею, вдохни ми светоносное Твое дарование, яко да славлю Тя Отцу и Сыну совокупляема.

Иже небесным силам святостнаго дохновения Твоего благодать даей, Утешителю, моего смысла яко Благ скверну исчистив, святости Твоя покажи исполнена.

Слава: **И**сточниче жизни веруемый, и струя естественныя благодати, Душе Божий Святый, ум мой умерщвленный оживотворив, Твоим действием возстави пети Твое Божество.

И ныне: Богородичен: **Х**рам Дево бывши Божий, нашествием Духа, содетельною силою Его, силу дарующа рождественну Благодатная, еюже родила еси плотию Слово безначальное.

Песнь 3.

Ирмос: Прежде век от Отца рожденному нетленно Сыну, и в последняя от Девы воплощенному безсеменно, Христу Богу возопиим: вознесый рог наш, Свят еси Господи.

Имея по естеству, хотения силу стечну, небесныя премирныя, яко Бог содетельствуя, Дух Святый непрестанно учит вопити: Свят еси Господи.

Песньми немолчными, облиставшую благодать Духа богоглаголивых апостол, в дыхании бурне, согласно славим, со безплотными вопиюще лики: Свят еси Господи.

Слава: **Е**дину власть, и Божество едино, и силу, едино начало и Царство Святыя Троицы, мудрствующе поем, в трисвятом гласе вопиюще: Свят еси Господи.

И ныне: Богородичен: **К**олеснице светоносная, и светлое пребывалище всечистая, херувим вышши сущи, Бога бо на руку носившая. Темже ти вси вопием чистая: радуйся всеблаженная.

Песнь 4.

Ирмос: Жезл из корене Иессеова, и цвет от него Христе от Девы прозябл еси, из горы хвальный, приосененныя чащи, пришел еси воплощся от Неискусомужныя невестственный и Боже, слава силе Твоей Господи.

Великая даруяй нам Дух Всесвятый, на апостолы найде яко Божествен, яко Благ, яко исполняя всяческая, яко боготворя, яко освящая, яко всех творителен, владыческий, и самовластен.

На престоле Христе Отческом сед, низпослал еси учеником Твоим Утешителя, якоже обещался еси Спасе, яко Бога грядуща: посылая же несопротивна, яко всех Содетеля, из Отца исходяща.

Слава: Глаголати языки пророк будущая научи Дух древле Всесвятый: языки же премудрых апостол вещает величия Божия во гласе дыхания бурнейша, ныне существенно спребывай.

И ныне: Богородичен: Врата умнаго света именуем Тебе Богомати, имиже вниде к нам Христос, красен явился блистаньми Божества, в плотстем одеянии покровен, невидимъ яко Бог: ныне же по нам видимъ.

Песнь 5.

Ирмос: Бог сый мира, Отец щедрот, великаго совета Твоего Ангела, мир подавающа послал еси нам. Тем богоразумия к свету наставльшеся, от нощи утреннююще, славословим Тя Человеколюбче.

О Душе премудрости и страха Божия, истины, совета и разума, мир подавай, вселися в ны, яко да освятившеся Твоим вселением, из нощи утреннююще, славословим Тя Человеколюбче.

Иже вся содержи, и всех сый Господь, Иже тварь соблюдаяй непадаему, подаждь святѣбу нам и просвещение, яко да насытившеся Твоего светодательства, из нощи утреннююще, славословим Тя Человеколюбче.

Слава: Иже древле закон начертавый Моисею, новаго завета веления, и закон благодати излагает ясно, во апостольских сердцах написав, Божественный Утешитель нашед, яко Человеколюбец.

И ныне: Богородичен: Клятву Евину всех матере, Твоим Рождеством Дево, упразднила еси, миру благословение возсиявши Христа. Темже радующеся, усты и разумом Богородицу воистинну Тя исповедающе блажим.

Песнь 6.

Ирмос: Из утробы Иону младенца изблева морской зверь, якова прият: в Деву же всельшееся Слово, и плоть приемшее пройде сохраншее нетленну. Егоже бо не пострада истления, рождшую сохрани неврежденну.

Твоим учеником исполняя обещание, Духа Христе сим послал еси, действо великих чудес дарующа, и языки огнезрочныя дарствующа, да Твоего познания язык стада исполнят.

Прииди к нам Душе Святой, причастники Твоея содевая святости, и света невечерняго, и Божественныя жизни, и благоуханнейшаго раздаяния: Ты бо река Божества, из Отца Сыном происходящий.

Слава: Спаси Утешителю, верно поющих боголепное пришествие Твое, и очисти от всякия скверны, яко благоутробен, и покажи достойны Твоего осияния, и светом Твоим боговиднейшим сотвори я нескверненна зеркала.

И ныне: Богородичен: Весь лик пророческий от Бога тайнонаучимъ, предглагола таинство неизреченнаго и Божественнаго воплощения Бога Слова, из Тебе Дево Мати: Ты бо истиннейший и древний совет явила еси.

Седален, глас 8.

Подобен: Премудрости Слова:

Всесвятый Дух ныне сошед на апостолы, видом огненным, ужасом исполни языков соборания: языки бо глаголющих огненными Человеколюбче, свою кийждо беседу слышаше. Темже и чудо неверным, яко пьянство, верным же спасительное воистинну познавашеся. Сего ради славим державу Твою Христе Боже, прегрешений оставления просяще низпослати богато рабом Твоим.

Песнь 7.

Ирмос: Отроцы благочестию совоспитани, злочестиваго веления небрегше, огненнаго прещения не убояшася, но посреди пламене стояще пояху: отцев Боже благословен еси.

Ныне обетования предложение Христова исполняется: разделения бо языков Духа пришествие показа учеником, облиставшее от Троицы единого Пребожественнаго.

Древле убо разделися согласие языков безсловесное: ныне же ко единому сличеству яве собрашася, самодействующу Честному и Божественному Духу, от Троицы Пребожественныя единому.

Слава: Свыше носиму дохновению Святаго Духа, величия Божия преславно вещаху апостоли Христовы, согласно поюще: отцев Боже благословен еси.

И ныне: Богородичен: Образ Твоего Рождества трие отроцы в пещи показаша: яко бо пребыша огнем невредами, сохранилася еси чиста, приемши во чреве огонь нестерпимый, отцев Бога Благословеннаго.

Песнь 8.

Ирмос: Чуда преестественнаго росодательная изобрази пещь образ: не бо яже прият палит юныя, яко ниже огонь Божества Девы, в нюже вниде

утробу. Тем воспевающе воспоем: да благословит тварь вся Господа, и превозносит во вся веки.

Святой Душе исходяй от Бога, святость всем подаждь в Тя верующим: Свят бо, и подателен человеком святости, Ты еси. Тем воспевающе воспоем: да благословит тварь всякая Господа, и превозносит во вся веки.

Даеши подательне яко Благодетель дар благодати, Тебе поющим Утешителю: благих бо подателен еси, и благодати пучина. Тем воспевающе воспоем: да благословит тварь всякая Господа, и превозносит во вся веки.

Слава: Господь животворящъ есть Дух, самодвижимъ, самовластен, разделяя якоже хочет даров раздаяния, самовладычен, самоповелителен, безначален. Тем воспевающе воспоем: да благословит тварь всякая Господа, и превозносит во вся веки.

И ныне: Богородичен: Кто Твоему премножеству благоутробия не дивится, Безначальне Слове? Нас бо ради обнищал еси богат сый, и во чреве Девы святая вселился еси. Тем воспевающе воспоем: да благословит тварь всякая Господа, и превозносит во вся веки.

Песнь 9.

Ирмос: Радуйся девственная похвало, радуйся Мати Пречистая, Юже вся тварь божественными песньми величаем.

Се к нам Утешителя иного низпослал еси, единосущна Тебе Слове, и Отцу Твоему сопрестольна.

Спаси от искушения Утешителю, Бога мудрствующия Тя, и славословящия Твое пречечное бытие.

Слава: Прииди к нам Утешителю, Твоего утешения исполняй, славою Твоею неизреченною богословящия.

И ныне: Богородичен: Невесто Божия Всенепорочная, славословящия Тя и чтущия достойно, избави от искушений молитвами Твоими.

Вместо Достойно: поем ирмос тойже. По трисвятом кондак праздника.

В ПОНЕДЕЛЬНИК СВЯТАГО ДУХА, НА ПОЛУНОЩНИЦЕ

По 1-м трисвятом глаголем тропарь праздника. По 2-м трисвятом глаголем кондак праздника. **Г**осподи помилуй. 12. И отпуст. Молитвы же за упокой не глаголем.

В ПОНЕДЕЛЬНИК СВЯТАГО ДУХА

НА УТРЕНИ

На **Б**ог Господь: тропарь праздника глас 8-й:

Благословен еси Христе Боже наш, Иже премудры ловцы явлей, низпослав им Духа Святаго, и теми уловлей вселенную, Человеколюбче слава Тебе. [Трижды.]

По 1-м стихословии, седален, глас 4-й:

Подобен: Удивися Иосиф:

Попразднственный вернии, и конечный праздник, празднуим светло, сей есть Пятдесятница, обещания исполнение и предложения: в сей бо огонь Утешителей сниде на землю, яко в виде язык, и ученики просвети, и сия неботаинники показа. Свет прииде Утешителя, и мир просвети.

Слава, и ныне, тойже:

По 2-й кафисме седален, глас и подобен тойже:

Духа источник пришед на землю, во огненные реки разделяясь мысленно, апостолы орошаше просвещая: и бысть им облак орошай огонь, просвещай тех и одождаяй пламень, имиже мы прияхом благодать, огнем же и водою. свет прииде Утешителя, и мир просвети.

Слава, и ныне, тойже:

Таже оба канона праздника: 7-го гласа, со ирмосом на 8: и 4-го гласа, со ирмосом на 6.

Песнь 1. Глас 7-й:

Ирмос: Понтом покры фараона с колесницами сокрушай брани мышцею высокою, поим Ему, яко прославися.

Делом, якоже древле учеником обещал еси, Утешителя Духа пославый Христе, возсиял еси миру свет Человеколюбче.

Законом древле проповеданное и пророки, исполнися: Божественного бо Духа днесь всем верным благодать излиися.

Иный канон Глас 4-й:

Ирмос: Божественным покровен медленоязычный мраком, извитийствова богописанный закон: тину бо оттряс очесе умнаго, видит Сущаго, и научается Духа разуму, хваля Божественными песньми.

Рекоша чистая и честная уста: разлучения вам не будет, о друзи! Аз бо на Отчем вышнем престоле соседя, излию Духа, возсияти желающим благодать независтную.

Предел прешедшее истиннейшее Слово, тихообразно совершает сердце: дело бо скончав, возвесели други, дыханием нужным и огненными языки, подав Духа Христос, якоже обещася.

Катавасия: Божественным покровен ...,

Песнь 3.

Ирмос: С высоты силою, учеником Христе, дондеже облецетесь, рекл еси, сядите во Иерусалиме: Аз же яко Мене, Утешителя иного, Духа Моего же и Отча пошлю, в Немже утвердитесь.

Божественного Духа нашедшая сила, раздельшийся древле глас, зле согласившихся, во едино приличие божественне совокупи, ведением Троицы вразумляющи верныя, в Нейже утвердихомся.

Ин.

Ирмос: Разверзе утробы нечадствовавшия узы, досаду же неудоботерпиму благочадствующия, едина молитва пророчицы древле Анны, носящия дух сокрушен, к сильному и Богу разумов.

Непостижима есть Богоначальнейшая: ветия бо изъяви безкнижныя, рыбаи премудрыя, заушающия словом, и от глубокия нощи изимающия люди безчисленны, блистанием Духа.

Бяше исходен от нерожденна Света, всесильный сияющий Свет, Егоже Сыном Отческия власти, ныне являет срасленное озарение, огненный глас в Сионе языком.

Катавасия: Разверзе утробы ...,

По 3-й песни, седален, глас 8-й:

Подобен: Премудрости слова:

Всесвятый Дух, ныне сошед на апостолы видом огненным, ужасом исполни языков собрания: языки бо глаголющих огненными Человеколюбче, свою кийждо беседу слышаше. Темже и чудо неверным, яко пьянство, верным же спасительное воистинну познавашеся. Сего ради славим державу Твою Христе Боже, прегрешений оставления просяще, низпослати богато рабом Твоим.

Слава, и ныне: тойже.

Песнь 4.

Ирмос: Смотряяй пророк в последняя Твое Христе пришествие, вопияше: Твою услышах Господи силу, яко вся спасти помазанныя Твоя пришел еси.

Во пророцех глаголавый, и законом проповеданный первее несовершенным, Бог Истинный Утешитель, Слова служителем и свидетелем познавается днесь.

Знамение Божества носяй, апостолом во огни, Дух разделися, и странными языки являшися, яко Отеческая Божественная сила грядущая есть, самоповелительная.

Ин.

Ирмос: Царю царей, яковый от яковаго един Слове произшедый от Отца безвиновнаго, равномошнаго Твоего Духа апостолом истинно послал еси, яко Благодетеля поющим: слава державе Твоей Господи.

Баню Божественную пакибытия словом растворив, ссложенное естество, дождоточиши ми струю от нетленнопрободеннаго Твоего ребра, о Божий Слове, запечатлея теплотою Духа.

Преклоняют вся Утешителю колена, Сыну же Отчу, Отцу срасленному, в Лицех бо видеша трегубых Существо истинное, неприкосновенное, безлетное, единое: возсия бо свет благодать Духа.

Да исполнятся вси Богоначальнейшим, елицы служителие Трисветлаго Существа: паче естества бо совершает яко благодетель, и огнесветит Христос во спасение, всю дая благодать Духа.

Катавасия: Царю царей ...,

Песнь 5.

Ирмос: Страха ради Твоего зачатый Господи во чреве пророков, и рожденный на земли Дух спасения, апостольская сердца созидает чиста, и в верных правый обновляется: свет бо и мир зане Твоя повеления.

Нашедшая сила днесь сия, Дух Благий, Дух премудрости Божия, дух от Отца исходяй, и Сыном верным нам явлейся подавателен, в нихже вселяется естеством святыни, в нейже зрится.

Ин.

Ирмос: Решительное очищение грехов, огнедухновенную примите Духа росу, о чада светообразная церковная: ныне от Сиона бо изыде закон, языкоогнеобразная Духа благодать

Якоже благоволи самовластно, необладанный исходит Дух от Отца, умудряя в языцех апостолы, печатлея живоносное Слово, Отчесильное, сообразное, Егоже Спас рече.

Да исцелит убо смыслы от греха, и се устрояше апостолов, Бог Слово всеначное, пречистый дом, в немже единомошнаго же и ссущественнаго ныне вселяется Духа свет.

Катавасия: Решительное очищение ...,

Песнь 6.

Ирмос: Плавающего в молве житейских попечений, с кораблем потопляема грехи, и душетленному зверю приметаема, яко Иона Христе, вопию Ти: из смертоносныя глубины возведи мя.

От Духа Твоего на плоть всякую, якоже рекл еси, богато изливал еси, и исполнилася всяческая Твоего ведения, Господи, яко из Отца Сын нетленно родился еси, и Дух нераздельный изыде.

Ин.

Ирмос: Очищение нам Христе и спасение Владыко, возсиял еси от Девы, да яко пророка от зверя морского персей Иону, от тли исхитиши, всего Адама всеродна падшаго.

Истинный нам правый во утробах вечно приимшым Дух, да обновивши Отчеисходный, и всесовокупленно, вещества ненавистнаго палительный скверн, кала же смыслов чистительный, Вседержителю.

Желательное достояние апостолом, сионяном чающим Твоего пришествия, познание Дух Отчерожденна Слова, речь жестокую языческих ласкательств скоро показав, огнедохновенно утверждаети.

Катавасия: Очищение нам ...,

Кондак, глас 8-й:

Егда снизшед языки слия, разделяше языки Вышний: егда же огненные языки раздаяше, в соединение вся призва, и согласно славим Всесвятаго Духа.

Икос: Скорое и известное даждь утешение рабом Твоим Иисусе, внегда унывати духом нашим, не разлучайся от душ наших в скорбех, не удаляйся от мыслей наших во обстояниях: но присно нас предвари. Приблизися нам, приблизися везде Сый, якоже со апостолы Твоими всегда еси, сице и Тебе желающим соедини Себе Щедре: да совокуплени Тебе поем, и славословим Всесвятаго Духа Твоего.

Синаксарий в понедельник по пятидесятнице, сиесть, Святаго Духа.

Стихи: Всякое дыхание прослави Духа Господня:

Стихи: Имже лукавых духов всеу дерзости.

В сий день, в понедельник Пятидесятницы, того Всесвятаго и Животворящаго, и Всесильнаго Духа празднуем, единого от Троицы Бога, единосущна и единосущна и единославна Отцу и Сыну. В сий убо день Пятидесятницы святым апостолом существенно найде, в виде огненных языков, сед на единого коегождо их в горнице, в нейже бяху пребывающе. Чести же ради ко Всесвятому Духу, и раздельне, и в сей Пятидесятнице узакониша праздновати Ему, иже вся добре различивше божественнии отцы. Обещавый бо Спас, прежде страсти, Утешителя пришествие, рек: Полезно есть, да Аз иду, аще бо Аз не иду, Утешитель не приидет. И паки: Егда же приидет Оный, научит вас, и наставит вас на всякую истину. И паки: Умолю Отца, и иного Утешителя послет вам, Духа истины, Иже от Отца исходит. И по страсти же, егда и на небо восходя, рече: Вы же пребудите во Иерусалиме, дондеже облечетесь силою с высоты: посылает Его: пребывающим бо им внегда

исполниться дню Пятидесятницы, об часе третьем дне на горнице, внезапно гром с небесе бысть, яко и множеству вселенныя претещи: и в виде огненных язык явися Дух Святыи, единому их коемуждо, не токмо дванадесятим, но и седмидесятим. И глаголаху странными языки, сиречь, един кийждо от апостолов, всеми языки языков глаголаше. Не убо своим языком апостолу глаголющу, иноплеменник слышаше, но коегождо языка язык апостол слышаше и глаголаше: отонудуже и собравшимся народом, пиянствовати возмнешася. Не ведый бо кийждо, како апостол особно всеми языки глаголаше, пиянствовати тому непщеваху. Инии же дивляхуся глаголюще: что убо хочет сие быти? бяху же сии от всея земли собрани праздника ради: парфяне, мидяне и еламиты, прежде мала от антиоха пленени бывшии. По Вознесении убо десятием днем минувшим, приходит Дух Святыи, и не абие вознестися Христу, да паче теплейшыя сотворит ученики ожидающыя Его. Глаголют же нецыи: яко на кийждо от дней, един кийждо ангельских чинов, приходя обоженной плоти оной покланяшеся. Десяти убо днем исполнымся, в десятый день Утешитель прииде, примирению бывшу Сыном. По пятидесятих же днех от Пасхи, в воспоминание ветхаго закона. Израиль бо отнелиже чермное море пройде, пятидесятием днем мимошедшим, Десятословие прият. Зри же и знамения: тамо гора, зде горница: тамо огонь, зде языцы огненнии. вместо же громов и мрака, дыхание зельное зде. В виде убо языков сниде Дух Святыи, яко свойственно имети к Живому Слову являет: или и яко апостоли научити и приводити языки, языком имяху. Огненных же, зане бог огонь поядаяй есть, и очищения ради: Разделяемых же, дарования ради. И якоже иногда един язык ведущих, на многия раздели, и размеси: тако и ныне, ведущих един язык на многия раздели, да соберет от оных языков по концам вселенныя разсеянные. В праздник же бывает, да множайшим собравшимся, повсюду вещь возгласится, и да иже в Пасхе прилучившиися, и яже о Христе бывшая видевшие, чудитися имут. В Пятидесятнице же, зане подобаше в неже время древле закон дан бысть, по немуже и Духа благодати излиятися, якоже и Христос сотвори в законной Пасхе, Свою Пасху совершив, истинную Пасху. Не на уста же седе Дух Святыи, но на главах апостолов, владычественное обьимая, и большее телесе, и самый ум, от негоже и язык еже глаголати имать. Или яко образ некий глас языком Дух испущает, яко рукополагати апостолы чрез главы, всея поднебесныя учителя: рукоположение бо на версе глав бывает. Глас же и огонь, занеже и в Синаи сия быша: яко да явится Тойжде Дух, и тогда и ныне законополагаяй, и вся различия. Смятеся же множество шумом дыхания, понеже мняху концу быти, елика иудеом Христос о разрушении их провозвести. Якоже огненны, рече: да никтоже телесно что о Дусе Святом смыслит. Пиянством убо осуждаются апостоли: но Петр став и провещава посреде народа, сие обличи, не истинною держимое, Иоилево пророчество в словеси привед, и покори от них яко три тысячи. Утешитель же Дух Святыи глаголется, яко утешати и покоити нас

могий: вместо бо Христа сего прияхом, и онаго тем имеюще, яко и ходатайствует о нас гласы неизглаголанними к Богу, яко Человеколюбец наш предстоит якоже и Христос: Утешитель бо и Он. Сего ради и иной Утешитель Дух Святой глаголется. Глаголет бо апостол: имамы Утешителя Иисуса к Богу. Иной же речеся, за единосущное: еже бо рещи, иной и иной, о тождественных, и купноестественных. А еже ино и ино, о различных вемах естествах. Сей Святой Дух един есть и Отцу и Сыну во всех: темже и соделоват купно с Нима все, и тое самое имущее быти воскресение. И елика хочет, творит: освящает, разделяет, новотворит, спосылает, умудряет, помазует пророки: просто рещи, во всем самовластный есть, всеильный, благий, правый, владычествуй. Тем вся премудрость, живот, движение, всяко причастный святыни, и всякому животу. Просто, вся имать, елика Отец и Сын, кроме нерождения и рождения, от Отца единого исходяй. Излившуся убо на всякую плоть Духу Святому, мир всякими дарованьми исполнися: и Тем вси языцы к боговедению руководствовашася, и всякий недуг, и всякая язя прогнана бысть. Трегубо же от Христа учеником дан бысть Дух Святой. Прежде страсти не яве зело. По Воскресении дуновением явственнее. Ныне же низпосла Сего существенно: паче же Сам сниде совершенный, просвещающий и освящающий их, и тем паки концы вселенныя приводяй, пришествием Святаго Духа.

Святых апостол молитвами Христе

помилуй нас. Аминь.

Песнь 7.

Ирмос: В печь огненную ввержени преподобнии отроцы, огонь в росу преложиша, воспеванием сице вопиюще: благословен еси Господи Боже отец наших.

Ветующим Божественная величия апостолом, Духа действо неощевавшееся пиянство неверствующим, имже Троица познавается, един Бог отец наших.

Нераздельное естество православно богословим Бога Отца Безначального, тояжде власти Слова и Духа, благословен еси, зовуще, Боже отец наших.

Ин.

Ирмос: Согласно возпуме органская песнь, почитати златосотворенный бездушный истукан: Утешителя же светоносная благодать почествует, еже вопити: Троице Единая, Равносильная, Безначальная, благословена еси.

Гласа пророковещательнаго не разумеюще, глаголаху безумнии виносотворенное пиянство, речи яко странны слышаша апостолов: благочестивии же Тебе вопием божественно: Богодетелю всех благословен еси.

Божественное учение возгреме видяй видения божественный Иоиль, Богоначальнейшаго, имже излию, рек, якоже Слова, Духа Моего свозопиющим: Естество Тривещанное Светлое, благословен еси.

Троичную убо раздели зря благодать, яко да явит три Ипостаси, почитати в простоте власти, но во едином ныне дни Господском, Сын, Отец и Дух благословен.

Катавасия: Согласно возпуме ...,

Песнь 8.

Ирмос: Неопальная огню в Синаи причащшаяся купина, Бога яви медленоязычному и гугнивому Моисеови, и отроки ревность Божия три непреборимыя во огни певцы показа: вся дела Господня Господа пойте, и превозносите во вся веки.

Животну свыше бурну носиму гласовне, Духа Всесвятого дыханию рыбарем, огненных видом язык величия Божия ветийствоваху: вся дела Господа пойте, и превозносите во вся веки.

Яко на некасаемую превосходяще гору, не боящися огня страшаща, приидите и станем на горе Сионской, во граде Живаго Бога, духоносным учеником ныне сликующе: вся дела Господа пойте, и превозносите во вся веки.

Ин.

Ирмос: Разрешает узы, и орошает пламень трисветлый богоначалия образ, поют отроцы, благословит же Единого Спаса и Вседетеля, яко Благодетеля, сотворенная всяческая тварь.

Память Христос человекоспасительных словес, яже от Отца слышав апостолом рече, Дух устроит языкоогненным видением, посаждая благословенно усвоенную, учуженная же поет Тя тварь.

Спасительно самовладычный Един, Свет самосиятельный, и подательный света сый, пришел еси исполняя апостолы, честный яко верх Твоим рабом, насытительный же Дух подаваеши.

Пояху пророк духонасыщенная уста, Твое телесное, о Царю, пришествие, и Дух от недр Отчих произшедший, несозданный, зданнодетелен, сопрестолен Тебе, единого вочеловечения верным честь.

Катавасия: Разрешает узы ...,

Честнейшую: не поем:

Песнь 9.

Ирмос: Не тления искушением рождающая, и Всехитрецу Слову плоть взаимодававшая, Мати Неискусомужная Дево Богородице, приятелище Нестерпимаго, село Невместимаго Зиждителя Твоего, Тя величаем.

На палящей древле огненной колеснице, ревнитель и огнедохновенный радуясь носимь, еже ныне возсиявшее дохновение свыше апостолом являше: от негоже освятившися, Троицу всем сказах.

Закона естеств кроме, странное слышашеся учеников: единому бо гласу гласящу Духа благодатию, различне оглашахуся людие, племена и языки божественная величия, Троицы ведению научающе.

Ин.

Ирмос: Радуйся Царице, матередевственная славо: всяка бо удобообращательная благоглаголивая уста витийствовать не могут, Тебе пети достойно: низумевает же ум всяк Твое Рождество разумети. Темже Тя согласно славим.

Пети подобаше естественнोजизненную Отроковицу: едина бо во чреве скры Слово, таящееся недугующаго человеческого естества. Иже в десных странах ныне седяй Отчих, посла благодать Духа.

Елицем дхну боготочная благодать, светящися, блистающе, изменяеми странным изменением благолепнейшим, равносильствующую несекому уведевши премудрость, Трисветлое существо славим.

Катавасия: Оба ирмоса вкупе.

Ексапостиларий. Подобен: Небо звездами:

Всесвятый Душе, исходяй из Отца и Сыном пришедый к безкнижным учеником, Тебе Бога познавших спаси и помилуй всех. [Дважды.]

Слава, и ныне: другой подобен:

Свет Отец, Свет Слово, Свет и Святой Дух, Иже во языцех огненных апостолом послася. И Тем весь мир просвещается Троицу почитати Святую.

На хвалитех: Всякое дыхание: поставим стихи 4.

И поем стихиры самогласны, глас 2-й:

Во пророцех возвестил еси нам путь спасения, и во апостолах возсия Спасе наш благодать Духа Твоего. Ты еси Бог первый, Ты и по сих, и во веки Ты еси Бог наш. [Дважды.]

Во дворех Твоих воспою Тя Спаса мира, и преклонь колена поклонюся Твоей непобедимей силе, вечер, и утро, и полудне, и на всякое время благословляю Тя, Господи.

Во дворех Твоих Господи, вернии колена душ и телес преклонше, воспеваем Тя безначальнаго Отца, и собезначальнаго Сына, и соприисносущнаго и Пресвятаго Духа, просвещающаго и освящающаго души наша.

Слава, и ныне: глас 8-й:

Языцы иногда размесишася дерзости ради столпотворения: языцы же ныне умудришася славы ради боговедения. Тамо осуди нечестивыя погрешением: zde просветил есть Христос рыбаи Духом. Тогда упразднися безгласие к мучению: ныне обновляется согласие ко спасению душ наших.

Славословие великое. Отпустительный тропарь праздника, глас 8-й:

Благословен еси Христе Боже наш, Иже премудры ловцы явлей, низпослав им Духа Святаго, и теми уловлей вселенную, Человеколюбче слава Тебе.

И отпуст глаголем праздника: **И**же в виде огненных язык, с небесе низпославый Пресвятаго Духа на святых Своя ученики и апостолы, Христос истинный Бог наш, молитвами Пречистых Своих Матерей, святых славных и всехвальных апостол, и всех святых, помилует и спасет нас, яко Благий и Человеколюбец.

И час 1-й.

В ПОНЕДЕЛЬНИК СВЯТАГО ДУХА

НА ЛИТУРГИИ

Изъобразительная. Блаженна, от канона праздника, песнь 3-я и 6-я.

Божественнаго Духа нашедшая сила, раздельшийся древле глас, зле согласившихся, во едино приличие божественне совокупи, ведением Троицы вразумляющи верныя, в Нейже утвердихомся. [Дважды.]

Непостижима есть Богоначальнейшая: ветия бо изъяви безкнижныя, рыбаки премудрыя, заушающыя словом, и от глубокия нощи изимающыя люди безчисленны, блистанием Духа.

Бяше исходен от нерожденна Света, всесильный сияющий Свет, Егоже Сыном Отческия власти, ныне являет срасленное озарение, огненный глас в Сионе языком.

От Духа Твоего на плоть всякую, якоже рекл еси, богато излиал еси, и исполнишася всяческая Твоего ведения, Господи, яко из Отца Сын нетленно родился еси, и Дух нераздельный изыде. [Дважды.]

Слава: **И**стинный нам правый во утробах вечно приимшым Дух, да обновиши Отчеисходный, и всесовокупленно, вещества ненавистнаго палительный скверн, кала же смыслов чистительный, Вседержителю.

И ныне: **Ж**елательное достояние апостолом, сионяном чающим Твоего пришествия, познание Дух Отчорожденна Слова, речь жестокою языческих ласкательств скоро показав, огнедохновенно утверждаеши.

Таже иерей, или диакон: **П**ремудрость, прости.

И входное: Вознесися Господи силою Твоею, воспоем и поем силы Твоя.

Тропарь, глас 8-й:

Благословен еси Христе Боже наш, Иже премудры ловцы явлей, низпослав им Духа Святаго, и теми уловлей вселенную, Человеколюбче слава Тебе.

Слава, и ныне, кондак, глас 8-й:

Егда снизшед языки слия, разделяше языки Вышний: егда же огненные языки раздаяше, в соединение вся призва, и согласно славим Всесвятаго Духа.

Трисвятое.

Прокимен Апостола, глас 6-й: Спаси Господи люди Твоя, и благослови достояние Твое.

Стих: К Тебе Господи воззову, Боже мой, да не премолчиши от мене.

Апостол ко ефесеем, зачало 229: (Еф. 5:8-19)

Братие, яко чада света ходите, плод бо Духовный есть во всякой благодости и правде и истине, искушающе, что есть благоугодно Богови. И не приобщайтесь к делом неплодным тмы, паче же и обличайте. Бываемая бо отай от них, срамно есть и глаголати. Вся же обличаемая, от света являются: все бо являемое свет есть. Сего ради глаголет: востани, спяй, и воскресни от мертвых, и осветит тя Христос. Блюдите убо, како опасно ходите, не якоже немудри, но якоже премудри, искушающе время, яко дние лукави суть. Сего ради не бывайте несмысленни, но разумевающе, что есть воля Божия. И не упивайтесь вином, в немже есть блуд, но паче исполняйтесь Духом, глаголюще себе во псалмех и пениих, и песнях духовных, воспевающе и поюще в сердцах ваших Господеви.

Аллилуиа, глас 2-й: Помилуй мя Боже, по велицей милости Твоей.

Стих: Не отвержи мене от лица Твоего и Духа Твоего Святого не отними от мене.

Евангелие от Матфея, зачало 75: (18: 10-20)

Рече Господь: блюдите, да не презрите единаго от малых сих, глаголю бо вам, яко Ангели их на небесех выну видят лице Отца Моего Небеснаго. Прииде бо Сын Человеческий взыскати и спасти погибшаго. Что вам мнится? Аще будет некоему человеку сто овец, и заблудит едина от них, не оставит ли девяносто и девять в горах и шед ищет заблудшия? И аще будет обрести ю, аминь глаголю вам, яко радуется о ней паче, неже о девяносто и девяти не заблудших. Тако несть воля пред Отцем вашим Небесным, да погибнет един от малых сих. Аще же согрешит к тебе брат твой, иди и обличи его между тобою и тем единым. Аще тебе послушает, приобрел еси брата твоего. Аще ли тебе не послушает, поими с собою еще единаго или два, да при устех двою или трех свидетелей станет всяк глагол. Аще же не послушает их, повеждь церкви, аще же и церковь преслушает, буди тебе якоже язычник и мытарь. Аминь бо глаголю вам, елика аще свяжете на земли, будут связана на небеси, и елика аще разрешите на земли, будут разрешена на небесех. Паки аминь глаголю вам, яко аще два от вас совещаема на земли о всяцей вещи, еяже аще просита, будет има от Отца Моего, Иже на небесех. Идеже бо еста два или трие собрани во имя Мое, ту есмь посреде их.

За Достойно: поем и до отдания ирмос:

Ирмос: Радуйся Царице, матередевственная славо: всяка бо удобообращательная благоглаголивая уста витийствовати не могут, Тебе пети достойно: низумевает же ум всяк Твое Рождество разумети. Темже Тя согласно славим.

Причастный: Дух Твой Благий наставит мя на землю праву.
Аллилуиа. [Трижды.]

[зри] Ведомо же буди, яко седмица сия Святыя Пентикостии разрешаема есть на сыр, рыбы, вино и елей.

Оставляются же и междочасия часов, и иже в Повечериях певаемый канон Пресвятыя Богородицы.